


dovuo çerne e a s'è dedicâ a-a primma. Però cantâ a l'â senpre cantòu, perché a l'â 'na bèlla voxe e tutti gh'an de longo domandòu de fâla sentî, anche inte òcaxoin ciù inpensabili, magari dòppo rionioin politiche inportanti-scime in gio pe-o mondo.

Inte questo libro a ripercore tutta a sò vitta politica, comensâ into PCI e finia inti DS, streatamente ligâ e mescciâ a-a vitta da sò famiggia. Interessante anche pe conosce da a vixin tante cöse da politica italiann-a.



**Antonio Infante e Luca Borghi (a cura di), *Ai bambini e ai fiori, lo splendore del sole – Il ruolo dell'Istituto Gaslini nella storia della pediatria*, Rizzoli, Milano 2015, pagg. 530**

Scibén ch'ò no segge zeneize, Antonio Infante o l'è chi da-o 1964 e o l'â avuo a che fâ co-o Gaslini anche primma d'èsine nominòu segretaio generale do 1985; pöi con atri incareghi o gh'â travagiòu fin'òua, donca o-o conosce ben e o l'â za curòu doî libbri che parlan do Geumo Gaslini e da stöia de l'uspiâ. Pròpio rilezëndoli, però, o s'è acòrto che mancava a stöia di megli ch'an réizo poscibile a realizazion do seugno de 'n poæ desfortunòu: questo libbro o parla de lô, ch'an fæto a stöia da pediatria, atravéso e sò testimonianse personali ò de chi l'â conosciui pe aveighe travagiòu insieme e aveili avui pe meistri. Gh'è anche in longo capitolo in sciâ scheua pe-e infermee di figeu. In libbro ben ben interessante in sce 'na realtæ zeneize famòza in tutto o mondo.



**Bruno Cicchetti, *Gole di buio. Nastri di luce*, Genova 2014, pagg. 172**

Questo libbro de poexie o s'arve co-ina longa introducion de l'aotò in sciâ *genesis* de l'òpia e in sciò rapòrto tra l'italian e o zeneize: perché e poexie en, sci, in italian co-o zeneize a fronte, ma no en l'unn-a a traducion de l'atra, in comun gh'an solo a tematica. En vintun "quaddri lirici", inframezæ da 'na dozenn-a de capitoletti intitolæ *Tacuiuno di viaggio*.

In fondo a-o libbro gh'è e *Note filologiche, stilistiche, lessicali e traduzioni* e a biografia de l'aotò, ch'ò scrive inta grafia ofiçia perché, da filologo quæ o l'è, o treuva ch'a segge o megio sistema pe scrive in zeneize.



**Alberto Podestà, *Quel fisico di Govi*, De Ferrari, Genova 2014, pagg. 80**

L'aotò o conta d'èsise atrovòu in canpagna co-i neveti e d'èsighe vegnuo coæ de contaghe 'na stöia, "romanzâ ma veroscimile", inventâ ma con di riferimenti reali a personn-e e fæti da Zena de çent'anni fa.

A stöia, scrîta pròpio coscì comme parlando a-i nevi, senza dâ goæi a mente a-e forme, a l'è 'na comedia di equivochi ch'a rigoarda sci o Govi che tutti pensemmo, ma no solo lê: de ciù no se peu dî pe no levâ a sorpreiza a chi vorîâ lêzila.

A prefazion ghe l'â fæta o nostro prescidente.

